

## Dörfleischter 1999

Der Dagobert Duck hett e huffe Gäld  
Doch mir kenne angeri Orte uf dr Wält  
Wo intressant si für d' Panzerknacker-Bande  
Drum si mir hie ir riiche Schwyz cho lande,  
Also liebi Lüt, gäht üs die Chole,  
Bevor se der D'Amato chunnt cho hole !

Üse Hans-Dampf-Stöckli i allne Sparte  
Seit, was är vo üs Bieler tuet erwarte :  
„Im Johr 01 findet d' Expo statt,  
U denn wott ig e schöni Stadt !“  
Liebe Housi - lo doch der Christo cho  
Für die viele Ruine iipacke z' lo !

Dr Yankee-Billy macht mit em Stili  
Und mit der Monika nume-n-es Spili  
Är hett schynbar beidi Ouge zue,  
Das Spiel hett gheisse „Blindi Chue“  
Wie süsch mir üs erkläre sötte,  
Dass är nid weiss, dass die tuet flötle !

Es Piueli für schlänker z' sy ,  
Es Piueli für stärker z' sy ,  
Es Piueli für schöner z' sy ,  
Es Piueli für schnäller z' sy ,  
Es Piueli für gschiider z' sy ,  
Es Piueli gäge Fälteli,  
Es Piueli, dass är wieder steit,  
Und es Piueli, dass weisch, wie's geit !

Mir Geischter möchte's nid ungerloh,  
Dr Zunft üse hätzlechschte Dank z' überloh,  
Nid wüu si a üsem Jubi-Fesch tüe glänze  
Mit fasch usnahmslose Absänze  
Nei-nei, mir si ganz eifach froh,  
Dass sie Zyt hei, a d' Bieler Fasnacht z' cho !

Uf Tele-Bärn si mir - das isch kei Witz  
Trotz der Lätitia nümme spitz,  
Ou am Schawinsky si Züri-Schnörre  
Chöi mir Geischter nüm'm' gseh und ghöre,  
Mir fröie-n-üs uf üses Lokalfernseh,  
De wirsch no meh dr Gring vom Stöckli gseh !

Trotzdäm 's em EHC tuet besser loufe,  
Hei si zweni Aktie chönne verchoufe,  
Es fählt 'ne a allem - ojemineh  
Das chasch uf däm nöie Kaländer gseh.  
Wüu's finanziell nid so guet tuet loufe,  
Müesse si ohni Uusrüschting umeloufe !

D' Tuube-Frou seit zum Tuube-Maa:  
I go wäg vom Touring, i ma's nümme ha,  
I weiss es Plätzli i dere Stadt,  
Ir Nidoungass, das isch souglatt,  
Die nöie Lampe - i cha dir's bewiese -  
Si gäbig zum hocke und zum schiisse !

Mir Geischter tüe gärn Schi-Renne luege,  
Doch hür isch das chuum meh zum zueluege,  
Drum hei mir jetz es grosses Verlange  
U tüe uf d' Schwyzer Meischterschafte plange,  
De wird's ändlech, ändlech sowit cho,  
Dass e Schwyzer z' overscht ufem Podescht tuet sto !